

## Mid-Day Dogri News Bulletin,

25<sup>th</sup> April 2025 – 12:25

### Army Chief J&K

सेना प्रमुख जनरल उपेन्द्र द्विवेदी होर पहलगाम आतंकवादी हमले दे मददेनजर अज्ज जम्मू-कश्मीर दे दौरे पर श्रीनगर पुज्जी गोदे न। सेना प्रमुख होर खित्ते च सुरक्षा हालात दा जायजा लै'रदे न। हासल जानकारी मूजब सुरक्षा बवस्था दी समीक्षा दे लेहाज कन्नै जनरल द्विवेदी हु'दे दौरे गी मता महत्वपूर्ण मन्नेआ जा'रदा ऐ। सेना प्रमुख होरें श्रीनगर दे बदामी बाग कैंटोनमेंट च फौज दे कोर कमांडरें कन्नै उच्ची सतह दी सुरक्षा समीक्षा बैठक कीती। एह्दे अलावा ओह कब्जा रेखा पर बने दे हालात दी बी समीक्षा करडन। सूत्तरें मूजब सेना प्रमुख होर पहलगाम च बैसरन मैदान बी दौरा बी करी सकदे न जित्थे जंदे मंगलवारें आतंकवादिएं बेदोसे सैलानिएं पर वैहशियाना हमला कीता हा। उ'आं इस बारै च अधिकारिक तौर पर फौज दी तरफा कोई बयान जारी नेई कीता गोदा ऐ।

<><><><><><>

### Bandipora Encounter

बांडीपोरा जिले दे बाजीपोरा कुलनार आहले जांगली इलाके च भारती फौज ते जम्मू-कश्मीर पुलस दी सांझी टीम आसेआ चलाये जा'रदे घेराबंदी ते तपाशी अभियान गी होर बघाई ते मजबूत करी दित्ता गोआ ऐ। एह् कार्रवाई अज्ज बड्डलै उत्तरी कश्मीर च भारी गोलीबारी दे बाद कीती गई ऐ। एह्दे शा पैहले सुरक्षाबलें ते आतंकवादिएं बश्कार टाक्करा उसलै शुरु होआ जिसलै आतंकवादिएं दी मजूदगी बारै पक्की सूह थोने परैन्त सुरक्षाबलें घने जांगली इलाके च घेराबंदी ते तपाशी अभियान चलाए दा हा। जि'आं गै सुरक्षाबलें दे जवान, संदिग्ध थाहरै कश पुज्जे तां आतंकवादिएं उ'दे पर गोलीबारी शुरु करी दित्ती जेह्दा सुरक्षाबलें गी तुरत परता दित्ता ते टाक्करा भखी पेआ। सुरक्षाबलें दा अभियान जारी ऐ ते इस सरबंघै च होर ब्यौरे गी अजें बलगेया जा'रदा ऐ।

<><><><><><>

### Havaladar

उधमपुर जिले दे डुडु बसंतगढ़ इलाके च आतंकवादिएं कन्नै टाक्करे दरान शहीद होए दे फौज दे हवलदार झंटु अली शेख होरें'गी अज्ज फौज आसेआ श्रद्धांजलि दित्ती गई। हवलदार पच्छिम बंगाल दे नदिया जिले दे रौहने आहले हे ते डुडु बसंतगढ़ च आतंकवाद रोधी अभियान दरान उ'नें देसै लेई सर्वोच्च बलिदान दित्ता।

<><><><><><>

Tahavur Rana

दिल्ली दी इक अदालतै मुंबई आतंकी हमलें दा षडयंत्र रचने आहले तहव्वुर राणा दी याचिका खारिज करी दित्ती ऐ। राणा नै अपने परोआर दे सदस्यें कन्नै गल्ल करने लेई एह याचिका दायर कीती ही। बशेश न्याऽधीश चंद्रजीत सिंह होरें एह फैसला सनाया। सुनवाई दे दरान राश्ट्री जांच एजेंसी – एनआईए नै राणा दी याचिका दा बरोध कीता। एनआईए नै तर्क दित्ता जे राणा गी ऐसी इजाजत दित्ती गई तां ओह अपने परोआर आहलें गी महत्वपूर्ण जानकारीयां देई सकदा ऐ। पाकिस्तान दी आर्मी मेडिकल कोर दा साबका अधिकारी राणा 26 नवम्बर 2008 च मुंबई च होए दा आतंकवादी हमलें दा मुख्य षडयंत्रकारी ऐ। उसी 11 अप्रैल गी अदालतै 18एं दिनें दी एनआईए हिरासतै च भेजेआ हा।

<><><><><><>

World Malaria Diwas

अज्ज विश्व मलेरिया दिवस ऐ। मलेरिया बमारी दे बारे च जागरूकता बधाने इस पर काबू करने, एहदी रोकथाम ते इसी पूरी चाल्ली खत्म करने सरबंधी उपाएं गी बढ़ावा देने आस्तै एह विश्व सेहत संगठन आस्सेआ कीती गेदी इक वैश्विक पैहल ऐ। इस ब'रे मलेरिया दिवस दा विशे सार ऐ मलेरिया दा खात्मा नतियै निवेश, परतियै कल्पना ते नमें सिरैया जागृति। एहदा मकसद मलेरिया बमारी दे खात्मे दी दिशा च होइ दी प्रगति च तेजी आन्नने आस्तै वैश्विक नीति थमां लेइयै समुदायिक कारवाई तगर सब्बने सतह पर जतनें गी परतियै सक्रिय करना ऐ।

<><><><><><>

Yogasan

दुई एशियाई योगासन प्रतियोगिता अज्जै थमां नमीं दिल्ली दे इंदिरा गांधी इनडोर स्टेडियम च होआरदी ऐ। योगासन भारत आसेआ आयोजित एह त्र'ऊं दिनें दी प्रतियोगिता 27 तारीख तगर चलोग। एहदे च 21 एशियाई मुल्खें दे 170 कोला मते एथलीट हिस्सा लैडन। एह आयोजन योगासन गी वैश्विक खेड्ड दे रूपै च बढ़ावा देने दे सरकार दे जतनें दा हिस्सा ऐ। विश्व योगासन दे महासचिव डॉ. जयदीप आर्य होरें दस्सेआ ऐ जे प्रधानमंत्री नरेंद्र मोदी होरें योग गी अंतरराष्ट्रीय मंच पर स्थापित कीता ऐ ते हून इसी खेड्ड दा दर्जा मिली गेआ ऐ।

<><><><><><>

BMC Doda

खित्ते दी समृद्ध जैविक बन्न-सबन्नता दी राक्खी-हिफाजत लेई मती सक्रियता कन्नै गैंह पुट्टदे होई डोडा दी जिला जैविक बन्न-सबन्नता प्रबंधन कमेटी नै सूबाई जंगलात अधिकारी हुं'दे दफतरै च कल इक महत्वपूर्ण बैठक लाई। इस सत्र दी प्रधानता जिला विकास काउंसल दे अध्यक्ष ते कमेटी दे प्रधान धनेन्तर सिंह कोतवाल होरें कीती। बैठक दरान, सांभ-संभाल आहली रणनीतिएं, राक्खी-हिफाजत आहले हीलें च बाददा करना ते मुकामी सतह उप्पर उपलब्ध संसाधनें दी उचित ढंगै-नै बरतून आहले कम्में दा जायजा लैता गेआ। बैठक दरान एह फैसला लैता गेआ जे लोकें गी जानकारी बनाने लेई जागरूकता कैपें ते स्कूलें च कार्यक्रमें दा बी आयोजन कीता जाना लोडचदा ऐ।

<><><><><><>